

რეგისტრირებულია
საქართველოს იუსტიციის
სამინისტროში
სარეგისტრაციო კოდი
040.170.280.12.005.006.844

საქართველოს ფასიანი ქაღალდების ეროვნული კომისიის დადგენილება N44

2004 წლის 11 ნოემბერი ქ. თბილისი

აქტივების მმართველ კომპანიებთან ხელშეკრულების დადების წესის შესახებ

„არასახელმწიფო საპენსიო დაზღვევის და უზრუნველყოფის შესახებ“ საქართველოს კანონის (შემდგომში “კანონი”) მე-40 მუხლის მე-2 პუნქტის „გ“ ქვეპუნქტის შესაბამისად, კომისია ადგენს:

1. დამტკიცდეს თანდართული “აქტივების მმართველ კომპანიებთან ხელშეკრულების დადების წესი”.
2. წინამდებარე დადგენილების პირველ პუნქტში განსაზღვრული წესი ამოქმედდეს გამოქვეყნებისთანავე.

თავმჯდომარე

მ. ჯიბუტი

წესი

“აქტივების მმართველ კომპანიებთან ხელშეკრულების დადების წესი”

მუხლი 1. ზოგადი დებულებები

1. ეს წესი შემუშავებულია “არასახელმწიფო საპენსიო დაზღვევის და უზრუნველყოფის შესახებ” საქართველოს კანონის (შემდგომში “კანონი”) მე-40-ე მუხლის 2-ე პუნქტის “გ” ქვეპუნქტის მოთხოვნათა შესაბამისად და განსაზღვრავს არასახელმწიფო საპენსიო სქემის დამფუძნებელსა და აქტივების მმართველ კომპანიას შორის ხელშეკრულების (შემდგომში – “აქტივების მართვის ხელშეკრულება”) დადების წესსა და ფორმას.

2. ამ წესში გამოყენებულ ტერმინებს აქვთ საქართველოს კანონით “არასახელმწიფო საპენსიო დაზღვევის და უზრუნველყოფის შესახებ” განსაზღვრული ტერმინებისა და განმარტებების მნიშვნელობა.

3. საპენსიო სქემის დამფუძნებელსა და აქტივების მმართველ კომპანიას შორის ხელშეკრულება უნდა გაფორმდეს წერილობით საქართველოს კანონმდებლობის, კანონის და ამ წესის მოთხოვნათა შესაბამისად.

მუხლი 2. ხელშეკრულების დადების პირობები

1. საპენსიო აქტივების მართვის უფლება აქვს მხოლოდ შესაბამისი ლიცენზიის მქონე პირს, რომელსაც სპეციალიზებულ დეპოზიტართან დადებული აქვს ხელშეკრულება სადეპოზიტო მომსახურებაზე.

2. აქტივების მმართველი კომპანია არ უნდა იყოს საპენსიო სქემის დამფუძნებლის, მენაბრისა და ან სპეციალიზებული დეპოზიტარის აფილირებული პირი ან თვით დამფუძნებელი ან სპეციალიზებული დეპოზიტარი, გარდა სადაზღვევო კომპანიისა და ბანკისა.

3. საპენსიო სქემის დამფუძნებელი ირჩევს აქტივების მმართველ კომპანიას და დებს მასთან საპენსიო დანაგროვთა აქტივების მართვის შესახებ ხელშეკრულებას, რომლის სტანდარტული ფორმაც გათვალისწინებულია ამ წესის დანართით.

4. აქტივების მმართველ კომპანიას საპენსიო დანაგროვი უნდა გადაეცეს ფულადი ფორმით თითოეული საპენსიო სქემის მიხედვით ცალ-ცალკე. საპენსიო სქემის დამფუძნებლის მიერ საპენსიო აქტივების მმართველი კომპანიისთვის საპენსიო დანაგროვის (სახსრების) სამართავად გადაცემა არ იწვევს ამ სახსრებზე საკუთრების უფლების გადაცემას.

მუხლი 3. მხარეთა ძირითადი ვალდებულებები

1. აქტივების მმართველი კომპანია უზრუნველყოფს მისთვის სამართავად გადაცემული სახსრების მართვას საქართველოს კანონმდებლობის შესაბამისად საპენსიო აქტივების გაზრდის მიზნით.

2. საპენსიო დანაგროვთა აქტივებით განხორციელებულ გარიგებებს აქტივების მმართველი კომპანია ახორციელებს თავისი სახელით, იმის მითითებით, რომ ის წარმოადგენს ამ აქტივების მმართველს და არა მესაკუთრეს.

3. საპენსიო დანაგროვთა აქტივებით განხორციელებულ გარიგებების ამსახველ დოკუმენტებში ამ მუხლის მე-2 პუნქტით განსაზღვრული მითითების ფორმა და შინაარსი განისაზღვრება აქტივების მართვის ხელშეკრულებით და ის უნდა შეესაბამებოდეს კანონმდებლობით დადგენილ ნორმებს.

4. აქტივების მმართველი კომპანია ვალდებულია აღრიცხოს საპენსიო დანაგროვთა აქტივების შემადგენელი ფასიანი ქაღალდები, განცალკევებულად თითოეული საინვესტიციო პორტფელისათვის.

5. თუ სხვაგვარად არ არის გათვალისწინებული ხელშეკრულებით, საპენსიო აქტივების მართვას აქტივების მმართველი კომპანია ახორციელებს პირადად. საპენსიო აქტივების მართვისას საპენსიო აქტივების არარეზიდენტი ემიტენტის ფასიან ქაღალდებში განთავსების მიზნით, ან კანონმდებლობით გათვალისწინებულ სხვა შემთხვევებში, თუ ეს გათვალისწინებულია აქტივების მართვის ხელშეკრულებით, აქტივების მმართველ კომპანიას შეუძლია გააფორმოს

ხელშეკრულება სხვა იურიდიულ პირებთან. ამ შემთხვევაში აქტივების მმართველი კომპანია პასუხისმგებელია საპენსიო სქემის დამფუძნებლის წინაშე მის მიერ სხვა პირისთვის გადაცემულ აქტივებზე.

აქტივების მმართველი კომპანია მასზე დაკისრებული ვალდებულებების შეუსრულებლობისათვის პასუხს აგებს, როგორც საპენსიო სქემის დამფუძნებლის ასევე მის მონაწილეთა წინაშე საქართველოს კანონმდებლობის შესაბამისად

7. აქტივების მმართველი კომპანია ვალდებულია საპენსიო დანაგროვთა ინვესტირება განახორციელოს მხოლოდ ლიცენზირებული სპეციალიზებული დეპოზიტარის მეშვეობით მასთან დადებული ხელშეკრულების საფუძველზე. აღნიშნული ხელშეკრულება შეთანხმებული უნდა იყოს საპენსიო სქემის დამფუძნებელთან და მასში გათვალისწინებული უნდა იქნეს კანონმდებლობით განსაზღვრული მოთხოვნები.

8. საპენსიო სქემის დამფუძნებელი პასუხისმგებელია რომ მის მიერ შერჩეული აქტივების მმართველ კომპანიასთან ხელშეკრულების დადება არ ეწინააღმდეგებოდეს კანონმდებლობით გათვალისწინებულ მოთხოვნებს.

მუხლი 4. აქტივების მმართველი კომპანიის მომსახურების ანაზღაურება

1. აქტივების მმართველი კომპანიის ანაზღაურების ოდენობა განისაზღვრება კანონის მე-40 მუხლის „დ“ პუნქტით გათვალისწინებული „აქტივების მმართველი კომპანიების მომსახურების ანაზღაურების ნორმების შესახებ“ კომისიის წესის შესაბამისად

მუხლი 5. ხელშეკრულების შეწყვეტა

1. აქტივების მართვის ხელშეკრულება შეიძლება შეწყვეტილი იქნეს:

ა) აქტივების მმართველი კომპანიის მიერ თავისი მოვალეობის არ ან არასათანადოდ შესრულების შემთხვევაში;

ბ) აქტივების მმართველი კომპანიის შესაბამისი ლიცენზიის შეჩერების ან გამოთხოვის შემთხვევაში;

გ) აქტივების მმართველი კომპანიის გაკოტრების შემთხვევაში;

დ) ხელშეკრულების ვადის გასვლის შემთხვევაში;

ე) კანონმდებლობით და ხელშეკრულებით გათვალისწინებულ სხვა შემთხვევებში.

2. აქტივების მართვის ხელშეკრულების შეწყვეტის შემთხვევაში:

ა) სამართავად გადაცემული აქტივების შემადგენელი ფულადი სახსრები, ხელშეკრულების შეწყვეტიდან სამი სამუშაო დღის განმავლობაში უნდა დაუბრუნდეს საპენსიო სქემის დამფუძნებლის ანგარიშზე;

ბ) დანარჩენი ქონება საპენსიო სქემის დამფუძნებლის მიერ არჩეული ადმინისტრატორის ზედამხედველობით უნდა გაიყიდოს უმოკლეს ვადაში და მიღებული ფულადი სახსრები უნდა ჩაირიცხოს საპენსიო სქემის დამფუძნებლის ანგარიშზე;

გ) საპენსიო სქემის დამფუძნებელს ახალ აქტივების მმართველ კომპანიასთან ერთად შეუძლია მიიღოს გადაწყვეტილება საპენსიო აქტივების შემადგენელი ქონების ნაწილის ახალი აქტივების მმართველი კომპანიისთვის სამართავად გადაცემის შესახებ.

3. აქტივების მართვის ხელშეკრულებით გადაცემული ქონება არ შეიძლება იყოს აქტივების მმართველი კომპანიის, ან ნებისმიერ სხვა პირის, ფინანსური ვალდებულების დაფარვის საგანი.

მუხლი 6. გარდამავალი დებულებები
ეს წესი ძალაში შედის გამოქვეყნებისთანავე.